

मार्निंग डोगरी न्यूज़ बुलेटिन,

समा. 09.20 Hrs

Headlines

1. उपराज्यपाल मनोज सिन्हा होरें आखेया जे जम्मू-कश्मीर च आतंकवाद अपने खीरी साह लै रदा ऐ ते इत्थे रमानदारी दी बहाली ते तरक्की कन्नै लोकें दे जीवन च सुधार होआ ऐ।
2. शिक्षा मंत्री स्कीना इत्तू होरें स्कूलें ते उच्च शिक्षा मैहकमे दी कारकदर्गी, उपलब्धियें ते प्रगति दी समीक्षा कीती।
3. बी.एस.एफ दे महानिरीक्षक हुंदा आखना ऐ जे पाकिस्तानी आतंकवादियें आसेया घुसपैठ दी कोशशें गी नाकाम करने लेई बल स्याले आली रणनीति कन्नै पूरी चाली त्यार ऐ।
4. सूचना ते प्रोद्योगिकी सचिव पीयूष सिंगला होरें जम्मू-कश्मीर च आई.टी पार्क त्यार करने लेई खडेरें गेदे अध्ययन समूह दी बैठक दी अध्यक्षता कीती।
5. सत्ताधारी नैशनल कांफ्रेंस नै 24 अक्तूबर गी होने आहले राज्यसभा दे चुनां लेई अपने त्रंऊ मेदवारें दे नाएं दी घोषणा कीती ऐ।

<><><><><><>

LG-Judo Cluster (Byte)

उपराज्यपाल मनोज सिन्हा होरें आखेया जे जम्मू-कश्मीर च आतंकवाद अखीरले साह लै रदा ऐ ते शांति ते रमानदारी कन्नै खित्ते च तरक्की ते खुशहाली आई ऐ। एल.जी होरें एह गल्ल 10में अखिल भारती पुलस जूडो क्लस्टर 2025 प्रतियोगता च बोलदे होई आखी। जम्मू-कश्मीर पुलस दी सराहना करदे होई- उनें आखेया जे पुलस नां छड़ा आतंकवाद दा सामना करा रदी ऐ सगुआं कनून बवस्था बनाई रखने च बी महत्वपूर्ण भूमिका निभा रदी ऐ। एदे इलावा नागरिकें दी हिफाजत करने दे कन्नो-कन्नो समाजी- आर्थिक विकास च बी अपनी अहम भूमिका देया रदी ऐ। उनें आखेया जे जम्मू-कश्मीर पुलस नै इक शांतिपूर्ण ते स्थाई समाज यकीनी बनाया ऐ- जेड़ा केन्द्र शासत प्रदेश च औद्योगिक विकास ते पूरी-पराती तरक्की च मदद करा रदा ऐ। एल.जी. होरें आखेया जे मुख्य भरै च सुरक्षा च बड़ा मता सुधार होआ ऐ। उनें आखेया.....(बाईट)

<><><><><><>

Itoo –Edu Review

शिक्षामंत्री स्कीना इत्तू होरें श्रीनगर आले सिविल सचिवालय च इक उच्ची स्तह दी बैठक दी अध्यक्षता कीती जेहदे च पूरे जम्मू-कश्मीर च स्कूली शिक्षा ते उच्च शिक्षा मैहकमे च चला रदी बक्ख-बक्ख परियोजनाएं दे संचालन ते प्रगति दा जायजा लैता गया। बैठक दौरान राष्ट्रीय उच्चतर शिक्षा अभियान- प्रधानमंत्री उच्चतर शिक्षा अभियान ते कैपेक्स बजट जनेही पैहलकदमियें दी स्थिति दी समीक्षा करदे होई मंत्री होरें चला रदी सब्भनं परियोजनाएं गी समें-सिर पूरा करने दे महत्व पर जोर पाया। एदे इलावा मंत्री स्कीना इत्तू होरें स्कूली शिक्षा च डिजिटल बदलाव दे महत्व पर बी लौ पाई ते सरबन्धत अधिकारियें गी निर्देश दिते जे ओह स्मार्ट क्लासरूम- आई.सी.टी. लैब ते ऑनलाईन Convent हासल करने आहली स्थूलतें गी तौले शा तौले लागू कराना।

<><><><><><>

BSF –Winter Strategy (Byte)

सीमा स,सीमा सुरक्षा बल बी.एस.एफ दा आखना ऐ जे उन्नै समूलचे जम्मू प्रांतै लेई औंदे स्याले लेई अपनी रणनीती त्यार करी लैती दी ऐ तां जे धुंध जा कोरे दी आड़ च पाकिस्तानी आतंकवादियें दी घुसपैठ दी कुसै बी कोशश गी नाकाम कीता जाई सकै। बी.एस.एफ. दे जम्मू फ्रन्टियर दे आई.जी. शशांक आनंद होरें कल दस्सेया जे खूफिया जानकारियें थमां पता लगदा ऐ जे आप्रेशन सिंदूर दौरान पुजे दे नुक्सान कारण पाकिस्तानी आतंकी संगठन जियां जे जेश-ए-मोहम्मद ते लश्करे तैयबा अपने आपैं गी परतियै खडेरने लेई पूरी टिल्ल ला करदे न ते इंदी कोशश ऐ जे मते शा मते आतंकवादियें दी भारत

अंदर घुसपैठ कराई जा। उनें आखेया जे बी.एस.एफ उन्दी हर माड़ी साजश गी नाकाम बनाने लेई पूरी चाल्ली तयार ऐ। उनें आखेया.....(बाईट)

<><><><><><>

CS Fruit Transpiration

मुखब सचिव अटल डुल्लु होरें कल इक उच्ची सतह दी बैठक च कश्मीर घाटी थमां फलें दी खेप मुल्खै दे बक्ख-बक्ख हिस्सें च पुजाने लेई कीते जा रदे बंदोबस्तें दा जायजा लैता। बैठका च डुल्लु होरें जम्मू-श्रीनगर राष्ट्रीय जरनैली सिडक दी मजूदा स्थिति दी बी समीक्षा कीती ते इसी परतियै पूरी चाली ब्हाल करने बारे बी जानकारी हासल कीती। उनें चेचे तौरा पर कश्मीर घाटी थमां औने आहले फलें दे ट्रकें ते बाहरा औने आहली जरुरी चीजें-बस्तें दे ट्रक ते टैंकरें दी आओ-जाई दी स्थिति बारे बी तफसील हासल कीती। लमें छिंडे धोड़ी माल ढोआ दी स्थिति बारे पुच्छदे होई अटल डुल्लु होरें मुम्बई-कोलकाता ते बेंगलुरु जनेए महत्वपूर्ण बजारें धोड़ी रेल माल-गड्डियें दी सेवा शुरु करने दी जरुरत पर बी जोर दिता ते आखेया एहदी संभावनाएं दा तौले पता लाया जा।

<><><><><><>

Buyer –Seller Meet

उद्योग ते बपार सरबन्धी कमीशनर सैक्रेटरी विक्रमजीत सिंह होरें रिवायती दस्तकारी गी बढावा देने लेई बडगाम च खरीददारें ते विक्रेताएं गी किट्टे इक्के मंच पर आनने आली त्रौं दिनें दी **Buyer Seller Meet** दा उदघाटन कीता। इस कार्यक्रम दा आयोजन जम्मू-कश्मीर बपार संवर्धन संगठन JKPTO आसेया कीता गया ऐ ते जम्मू-कश्मीर दी दस्तकारी-विरासत गी बढावा देने दे कन्नो-कन्नी एहदे च नमें सिरैया जान भरने लेई कीते जा रदे जतनें दे तैहत भारत सरकार दे कपडा मंत्रालय च दस्तकारी सरबन्धी विकास कमीशनर आसेया प्रायोजित कीता जा रदा ऐ। जम्मू ते कश्मीर दौनें खित्तें दे तकरीबन 50 कारीगर इस कार्यक्रम च हिस्सा लै रदे न- जिन्दे च हत्थे कन्नै बनाए गेदे जी.आई टैग आले बक्ख-बक्ख उत्पाद जियां जे पशमीना-कानी शॉल-सोज़नी कढ़ाई-पेपर मैशे- Chain Stitch- बसोहली चित्रकला ते ऊन दी कढ़ाई आली बक्ख-बक्ख चीजें दा प्रदर्शन कीता जा रदा ऐ।

<><><><><><>

Secy- IT Park

सूचना ते टैक्नोलजी मैहकमे दे सचिव डाक्टर पीयूष सिंगला होरें जम्मू-कश्मीर च आई.टी पार्क तयार करने लेई खडेरें गेदे अध्ययन समूह दी बैठक दी अध्यक्षता कीती। सिविल सचिवालच जम्मू च लगगी दी इस बैठका च केन्द्र शासत प्रदेश च अंतराष्ट्रीय सतह दा इक आई.टी पार्क कायम करने बारे तयार कीती गेदी शुरुआती रिपोर्ट दे बारे च बी तफसीली चर्चा कीती। मीटिंग च फैसला लैता गया जे प्रस्तावित आई.टी पार्क गी आई.आई.टी जम्मू दे बैनर हेठ विकसित कीता जाहग ते एहदे बारे रिपोर्ट दंडू चरणें च तयार कीती जाहग। पैहला गेड़ उच्च शिक्षा संस्थान दे नमूनें दे रुपे च ते दुआ गेड़ एहदे निजी निवेश ते सार्वजनिक निजी भेयाली दे इक नमूने दे तौरा पर कीता जाहग।

<><><><><><>

NC –RS Nominees (Byte)

सत्ताधारी नैशनल कांफ्रेंस नै 24 अक्तूबर गी होने आहले राज्यसभा दे चुनां लेई अपने त्रंडू मेदवारें दे नाएं दी घोषणा कीती ऐ ते आखेया ऐ जे चौथी सीट लेई कांग्रेस पार्टी कन्नै सलाह-सूत्तर चलै करदा ऐ। पार्टी मुख्यालय च इक प्रैस कांफ्रेंस गी सम्बोधित करदे होई नैशनल कांफ्रेंस दे जनरल सैक्रेटरी अली मोहम्मद सागर होरें दस्सेया जे पार्टी नै चौधरी मोहम्मद रमजान- शम्मी आबरॉय ते सज्जाद किचलू होरें गी पार्टी दी तरफा अपना मेदवार चुनेया गया ऐ। चौधरी रमजान कुपवाड़ा जिले थमां एम.सी. दे इक सीनियर लीडर न- शम्मी आबरॉय इक कारोबारी न जेहड़े सियासत च आए न ते सज्जाद किचलू होर किशतवाड़ थमां विधायक ते मंत्री बी रेही चुके देन। इस बारे होर मती जानकारी दिंदे होई एन.सी. दे सीनियर लीडर नासिर असलम वानी होरें आखेया.....(बाईट)

<><><><><><>

Poshan Maah (Byte)

महिला ते बाल विकास मंत्रालय आसेया आयोजित पोषण माह दे समारोहें च आयुष मैहकमा रामबन बदी-चढियै हिस्सा लै रदा ऐ ते सुपोषित भारत दे लक्ष्य गी हासल करने लेई लगातार जतन कीते जा रदे न। जिले च बक्ख-बक्ख कैम्प लोआए जा रदे न जिन्दे च गर्भवती महिला-बच्चें ते किशोर उम्री देयें कुडियें लेई योग-सत्रें दा आयोजन कीता जा रदा ऐ। आंगनवाड़ी केन्द्रें च लाभार्थियें आस्तै पोषण किटां बी बंडिया जा रदियां न। आकाशवाणी समाचार कन्नै गल्ल करदे होई सीनियर मैडिकल अफसर ते जिला योग Coordinator Dr. Masood Iqbal Zarger होरें आखेया.....(बाईट)

<>< ><><><><>

DC –Bye Poll Preparedness

जम्मू दे डिप्टी कमीशनर डाक्टर राकेश मिन्हास जेहडे जम्मू दे जिला चुनां अधिकारी बी हैन-होरें नगरोटा असैम्बली हल्के च उप-चुनां लेई तयारियें दा जायजा लैने लेई नोडल अधिकारियें कन्नै इक बैठक दी अध्यक्षता कीती। इस दौरान कार्य-योजना गी मुकदा रुप देने ते चुनां प्रक्रिया गी बवस्थित बनाने लेई जिम्मेदारियां सौपने पर बी चर्चा कीती गई। अधिकारियें कन्नै गल्लबात करदे होई डी.सी. होरें इस गल्लै पर जोर पाया जे उप-चुनाएं गी पूरी चाली सुतंत्रतापूर्वक-रमानदारी ते पारदर्शी ढंगे नै करोआने लेई सब्भै लोडचदी गैई पुट्रियां जान।

<>< ><><><><>